

Elsku Mummi!

Nú er Ragna að fara til Reykjavíkur og ætlar að vera þar í vetur. Sjera Gísli faðir hennar er nýdáiinn.

Það hefur verið haldinn í U.M.F.E. fundur síðan þú fórst. Það var annar bragur á honum nú enda var það formaður en ekki varaformaður sem stjórnaði.

Árillus¹ las upp voða syrpu af orðum þar var þín oft getið. Það var talað um handavinnu meðal annars. Líklega verður haldið námskeið. Jeg er búin að eiga við kartöflurnar. Úr þessum garði sem er hjer heima komu tæpar 4 tonn en úr austurgarðinum 3 ½ eins og þú vissir. Það þurfti ekki annað en þú færir, nú unir hér engin ung stúlka, þær fara allar til Reykjavíkur, t.d. Ástríður², Sína³ og Lauga⁴ og Ella⁵.

Í dag er verið að sjóða niður kjet. Sveinn⁶ ætlar að lóða⁷. Nú er skólinn byrjaður. Ketill er í 3, bekk. Jakobína fer í skólann kl. 9 og kemur kl. 4. Við erum öll frísk; jeg held að Guðrún Hólmfríður fari bráðum að ganga, henni hefur farið svo ansi mikið fram síðan þið fóruð. Nú erum við vinnukonulausar nema hvað Gusta⁸ skreppur til okkar þegar hún getur. Í nóvmeber fáum við stúlku. Jeg má nú ekki vera að að skrifa meira enda bíst jeg við að þú eigir nóg með að komast fram úr þessu það er svo illa skrifað. Það sjer á að mig vantar sjálfblekung.

Vertu blessaður og sæll, jeg bið ósköp vel að heilsa Pjetri⁹ og Vigdísi¹⁰ og öllum í húsinu.

Þín Vigga.

Ætlarðu ekki að senda okkur línu við „ljelegheit“

¹ Árillus var þekktur í Reykjavík, - sá fyrsti (?) sem byrjaði með kauphallarmál.

² Ástríður dóttir Guðmundar kaupmanns. Kristján, kallaður Kiddi, var bróðir hennar. Ástríður er á mörgum myndum úr læknishúsinu.

³ Sína=Sjana ?

⁴ Enn óþekkt.

⁵ Elín Guðjónsdóttir móðirsystir Ingu (Ingibjargar Sigvalda).

⁶ Sveinn var járnsmiður á Eyrarbakka, faðir Ásdísar Thoroddsen og þeirra systra.

⁷ Lóða dósirnar. Þegar glerkrukurnar komu var mikill fögnuður. GHG man eftir lóðningarbasli.

⁸ Gústa, Ágústa, í Brennu, uppeldisdóttir Ljósu, Þórdísar ljósmóður.

⁹ Pétur bróðir, hann var þarna byrjaður í læknisfræði, - hann hætti síðar.

¹⁰ Vigdís Pétursdóttir, systir Gísla, hún bjó á Klapparstíg 20, gift Einari Finnssyni. Guðmundur bjó hjá þeim. Þau áttu einnig (?) húsnaði á Klapparstíg 11. Jakob gat komið með margar skemmtilegar sögur af Vigdísi.

Læknishúsinu 14. okt. 1921

Elsku Mummi!

Þakka þjer fyrir brjefið þitt. Jeg ætla að senda þjer nokkrar línur á stolið brjefsefni. Vonandi að eigandinn sé ekki of glöggur. Jeg símaði í morgun til Árelúsar og skilaði þessu frá þjer hann skrifar þjer víst fljótlega.

Það verður víst fermt nú um mánaðarmót. Þú þyrftir að senda Teta¹ kort. Herdís þakkar þjer fyrir það, sem þú gerðir fyrir hana, pállinn er kominn með góðum skilum. Nú er jeg farin að hafa tíma hjá pabba. Það gengur nú allavega, jeg get nefnilega ekki haft tíma á morgnana fyr en stúlkan kemur sem hjá okkur verður. Hún kemur í nóvember og er dóttir Símonar² á Selfossi.

Ingimar³ er að öllu leyti í Mundakoti hjá Filipiu það ber ekki á öðru en samkomulagið sé gott. Hún hefur ekki sýnt hann stóra sinn ennþá. Eins og þú kannske manst þótti ekki neitt gott að búa hjá henni. Aðalsteinn er alltaf að stríða I. eitt meðal annars er það að I, gengur í gegnum þrönga hliðið í garðinum þegar hann kemur úr skólanum og fer heim að Mundakoti til Fil.(?) til að borða. Aðalsteinn segir það sje þrönga hliðið sem til lífsins liggir.

Mamma fekk brjef frá Laufey, sem er skrifað í Hollandi og myndir bæði af henni og börnunum. Þau voru búin að kaupa farmiða handa Helgu, stúlkunni sem hjá þeim var. Hún ætlaði nefnil. með þeim til Súmatra, en þá kom skeyti frá pabba hennar þar sem hann segir henni að koma heim. Halli skrifaði mömmu sinni. Hann hefur haft vinnu nú í sumar. Ekki held jeg að hann sje neitt hrifinn af Ameríku. Stína Guðmunds er nú í Reykjavík. Þú gætir beðið hana fyrir brjef til okkar.

Jeg bið að heilsa Vigdísí frænku og öllum hinum.

Allir biðja að heilsa öllum.

Viltu biðja hana Vigdísí að senda mjer undirlífið⁴ mitt við tækifæri.

Vertu blessaður - þín Vigga.

¹ Teti, Theódór, var barnabarn Guðmundar á Háeyri. Faðir hans hafði verið embættismaður úti á landi. Móðir hans var dóttir Guðmundar. Theódór var lengi hafnsögumaður í Reykjavík. Þeir Guðmundur voru miklir vinir alla tíð.

² Það varð mikill vinskapur við Sigríði og Símon á bænum Selfossi. GHG man eftir heimsókn þangað þegar hún var 3-4 ára er hún hljóp niður að ánni. Amma lét strákana, Sigga og Óla, hlaupa eftir henni. Aðspurð sagðist hún hafa ætlað stökkva yfir ána. Ólafur var síðar í sveit á Selfossi og var þar þegar taugaveikin gekk yfir læknishúsið.

³ Ingimar kvæntist síðar Sólveigu dóttur Guðmundar á Háeyri.

⁴ Undirkjöll alla leið upp á axlir, var saumaður úr lérefti og oft skreytt. Það var alltaf undir íslenskum búningi.

Kæri Mummi!

Pakka þjer fyrir brjef frá 19. þessa mánaðar.

Við vorum að fá þær frjettir að komnar væru 8 kindur frá Jóni á Búrfelli¹. Svo að á morgun þurfum við að fara í slátur. Það kvíða víst allir heldur fyrir nema Siggi, hann hlakkar til fyrir alvöru.

Það er úti námskeiðið sem U.M.F.E. hjelt. Það var haldin sýning á mununum. Allir urðu hrifnir og óskuðu eftir að annað námskeið yrði haldið. Og á mánudaginn var byrjaði annað. Þar er margt góðra manna t.d. læknisfrúin Guðrún Snæbjarnard. Svo er víst komið nóg fólk á það þriðja.

Á laugardaginn var héldu kennararnir bókasafnsskemmtunina, þessi var ekki síðri en þær sem á undan hafa verið haldnar. Aðalsteinn talaði, sömuleiðis Steinka Pjeturs² kennara. Ketill las upp kvæði og svo ljeku Sjana³ og Búlla⁴ smáleik og dans á eftir. Eins og þú kanske hefur heyrt er dóttir Símonar á Fossi⁵ komin til okkar og verður hjá okkur í vetur. Það er ágæt stúlka. Mamma varð veik í gær en í dag er hún betri, fór í fót nú í kvöld. Það var U.M.F.E. fundur, sá lang versti sem hefur verið haldinn.

Eyrbekkingar eru orðnir ákaflega spenntir fyrir gymnastik. Ingimar kennir leikfimi 4 kvöld vikunnar, 23 piltum 2 kvöld en 18 ungrúm 2 kvöldin. Þetta eru alt fyrirmyndar stúlkur, stórar og stæðilegar. T.d. Jórunn⁶ í Reginn, Jóna⁷ í Mundakoti, Imba⁸ Gunnars, Ella í Húsinu, Ástríður⁹ og Stína, mitt eigið jeg og fleiri. Við erum búnar að hafa 3 tíma og það er best að segja ekki meira.

Heilsufarið er hjer gott nema ef telja skyldi að allir eru að deyja úr kvefi og að nafna þínum í Reginn er illt í tanni. Pabbi skar í hann í gær.

Veðrið er svona eins eins og gengur og gerist þegar við Lilla¹⁰ erum nýbúnar að þvo, nefnilega rigning.

Jeg þarf að fara að koma brjefinu frá mjer því það er orðið framorðið.

¹ Guðmundur var í sveit, kaupavinnu í Búrfelli til að vinna fyrir námi.

² Pétur kennari lést fyrir aldur fram, ekkjan bjó lengi á Bakkanum og synirnir, sem voru sérlega yndælir. Einn sonana, Jón, varð bankastjóri og hann sendi krans við útför Aðalbjargar. Pétur Pétursson þulur var yngstur þeirra. Ásgeir Pétursson var kvæntur Dýrleifu Árnadóttir frá Skútustöðum.

³ Sjana hét ? var Guðmundsdóttir bjó um tíma í Garði.

⁴ Búlla hét ? var Sigurðardóttir og bjó í Breiðabliki, gegnt læknishúsinu.

⁵ Selfoss

⁶ Jórunn Oddsdóttir, - móðir hennar sá um símann og síðar tók Jórunn við honum. Bróðir hennar Magnús var í símalagningu og fengu Pétur og Jakob vinnu hjá honum yfir sumartímam.

⁷ Mundakotin voru 3. Jóna var í miðbænum. Ragnar í Smára var ættaður frá Mundakoti 1, vestasta kotinu. Jón faðir hans var hreppstjóri\oddviti.

⁸ GHG kannast ekki við hana.

⁹ Systir Sjönu, Guðmundarbörn.

¹⁰ Mögulega er þetta dóttir Símonar á Fossi.

GG-003-VO
GG-003-VO.doc

Jeg bið afar vel að heilsa.
Vertu svo marg blessaður. Þess óskar Vigga.

Mamma og allir biðja að heilsa. Við erum búnar að fá rauða garnið og það allt. Viltu biðja Vigdís að kaupa ein 10 pund af mysosti og senda með Þórði austur.
Vigdís Ólafsdóttir.

Læknishúsinu 23. feb. 1922

Kæri Mummi!

Þakka þjer fyrir brjefin þín. Alltaf þykir mjer gaman að fá þau. Það er svo langt síðan jeg skrifaði þjer síðast, að jeg get ómögulega byrjað þar sem jeg hætti síðast. Þess vegna ætla jeg að byrja á endinum og halda svo fram eftir. Í gær var afmæli Sesselju. Jóna drakk kaffi hjá okkur svo kom Jóhanna og þá Jórunn¹ við að spila. Um daginn sýndu piltar leikfimi. Þeir voru ágætir. Jeg bjóst ekki við því svona góðu. - Á sunnudaginn var fórum við stúlkurnar sem erum í leikfimi austur í skóla og þar var tekin mynd af okkur. Það var fríður hópur, skaltu trúa og ekki þótti mjer óprýði að Ingimari sem sat hjá okkur. Jeg hefi víst ekki sagt þjer, að „Umf“ skemmtunin fór vel: Systrakvöldið var afar skemmtilegt. Þar voru sagðar sögur í rökkrinu, lesnar sögur, drukkið kaffi, borðaður búðingur, sungið og dansað. Áslaug setti skemmtunina. Hún gat þess að hitinn í hjörtum stúlkanna væri ómælandi.

Þetta heyrði Aðalsteinn og þegar hann talaði til þess að þakka fyrir sig gat hann þess að þetta væri víst satt með hitann, að minsta kosti væri handarbakið á sjer skaðbrent. Það heltist nefnilega úr kaffibolla á það.

Um þetta kvöld voru ortar margar vísur. Jeg man nú enga þeirra í svipinn.

Það var ansi skemmtilegt á námskeiðinu. Það gengur alt svo rólega til þar. Herdísí finst munur á því og fyrsta námskeiðinu. Þar var margt villimanna. t.d. Guðm. og Ásgeir Pjeturssynir² og Björn Guðmundsson. Fólkið er sem ákafast að tínast af Bakkanum. Það kemur skarð í stúlknaþópinn þegar Ástríður og Lauga fara. Og svo tala jeg ekki um það stóra skarð sem kom í pilta hópin þegar nafni þinn fór. Hittirðu hann ekki oft?

Ásti fór í morgun, jeg bað hann fyrir skautana til þín, en lykillinn er víst hjá þjer. Jeg hefi ekki fengið hann. Silla³ biður að heilsa þjer og óskar þjer til hamingju. Á síðasta U.M.F. fundi var kveðist á, þar komu nokkrar vísur, sem gaman var að. Ingimar kunnir margar. Guðm. Pjetursson er alltaf að yrkja. Á samkomum hjer hafa verið sungnar gamanvísur eftir hann. Aðallega leggur hann samt fyrir sig níðvísur. Bólu-Hjálmar er að hans dómi eitt af allra bestu skáldum.

¹ Jórunn Oddsdóttir, hún smíðaði gullið á dúkkuna hennar GHG og er á mynd með GHG og dúkkunni. Systurdóttir hennar, Móheiður, dóttir Önnu Oddsdóttur og Helga, bjó á Tumastöðum þegar GHG var í Fljótshlíðinni. Hún bauð GHG að þvo í nýju þvottavélinni sinni. Móheiður var síðar nágrenni Bjargar og Friðgeirs á Selfossi.

² Synir Péturs kennara. Ásgeir kvæntist Dýrleifu Árnadóttur frá Skútustöðum.

³ Silla vann síðar á útvarpinu. Hún var um tíma í samabndi við Vigdísí eftir fráfallið.

GG-004-VO
GG-004-VO.doc

Nú er jeg með síðasta stílinn í Geirs-enskubók, búin að læra kvæðin og nokkrar af sögunum, - eruð þið komnir svona langt?

Vertu blessaður

þín systir Vigga.

Jeg bið ósköp vel að heilsa frændfólkinu og svo Rúnu og O-1-1-a⁴.

Spurðu Olla frá mjer, hvort hann muni eftir kveldinu, sem Lárus Jóhannesson var hjá okkur.

Vigga.

⁴ Ólafur sonur Sveinbjarnar sýslumanns á Eyrarbakka og Oddrúnar, sem síðar varð húsvörður í Alþingi. Olli dó ungur, - GHG minnir að hann hafi lært lögfræði.

Læknishúsinu 2. mars 1922

Elsku Mummi!

Þakka þjer fyrir brjefsnepil, sem jeg fekk frá þjer í gær. Þegar hann kom sat jeg með sveittan skalla við að sauma öskupoka. Jeg þurfti að sauma marga handa Katli og Óla en Kristinn¹ í Túni gaf Valgerði alla pokana, sem búið var að hengja á hann og þeir voru margir. Á laugardaginn var, kom jeg seint heim af námskeiðinu, því að þá var seinasti kennsludagurinn. Þegar jeg kom heim borðaði jeg kvöldmat og fór svo að búa til vendi og ekki hætti jeg fyr en fjórir vendir voru komnir, með öllum regnbogans litum. Það kom sjer líka vel að þeir voru myndarlegir, því þeir fengu að forframast á mánudaginn. Ketill sparaði sinn samt framan af morgninum. Hann ljét nægja að lemja Sesselju² með buxunum. Svo fóru þeir þrír austur á Háeyri og út í Sandþrýði. Þegar á daginn leið hrúguðust að þeim bollurnar, en jeg sat hjá og horfði á og vaknaði þó fyrst manna.

4-3.

Nú er jeg að koma að utan. Jeg gekk með Jóhönnu austur stíg. Jeg mætti nokkrum ríðandi mönnum. Einn þeirra var Lúðvík nokkur. Það er „nýtísku læknir“, sem ætlar að setjast að hjer. Óskar³ er farinn upp í Biskupstungur. Þau hjónin Guðrún og Óskar komu til okkar rjett áður en þau fóru. Mjer þykir þau svo skemmtileg. Annað kvöld á að vera U.M.F. fundur. Við Silla⁴ erum í dagskrárnefnd. Arelíus ætlar að hjálpa okkur svo ætlar hún Vigga mín að skaffa eitthvað.

Altaf er Arilíus⁵ jafn indæll. Það liggur við að mjer sje farið að þykja vænt um hann. Þú skalt samt þegja yfir því. Hjer var leikinn leikur sem Tengdapabbi heitir. Ingimar ljek tengdapabbann. - Þegar hann kemst nú svo langt að verða það í alvöru, þá verður gaman að lifa. En því miður á það víst langt í land. Hann lofaði mjer því einu sinni að hann skyldi (verða) tengdapabbi barna minna. Ef það verður má segja um þau hjón að þau sjeu af góðu fólki komin.

Ingimar biður að heilsa þjer og treystir þjer til að ná þessum böggli fyrir sig, sem hann á á pósthúsinu. Komdu honum með fyrstu ferð. Við Aðalsteinn samhryggðumst vini okkar „Jónatani Pálssyni“ er við heyrðum að sálmabók hans hafði verið gerð upptæk. Þó að við vitum ekki hver þessi Jónatan er rann okkur blóðið til skyldunnar.

¹ Bróðir Sigga í Túni. Kristinn var á aldri við Viggju.

² Líklega hefur Sesselja verið vinnukona frá Selfoss-bænum.

³ Óskar læknir Einarsson st. læknir á Eyrarbakka maí 1921 til febr. 1922 (samkv. Læknar á Íslandi)

⁴ Dóttur-dóttir Guðmundar á Háeyri. Móðir hennar missti manninn, og fluttist þá á Eyrarbakka með börnin m.a. Silla/Sigrún, sem varð vinkona Vigdísar, var lengi á tónlistardeild RÚV, Theodór, sem varð vinur Guðmundar og Kjartan, sem var yngstur.

⁵ Arilíus fluttist síðar til Reykjavíkur og stofnaði verðbréfmakað.

Bragarhátturninn minnir á Kvarnarhljóðið. Aðalsteinn fékk einum öskupoka meira en Ingimar. Það var aðeins ein stúlka, sem tók A. fram yfir I. Hver heldurðu að það hafi verið önnur en Imba hans. Það hefur komið til orða að Herdís færi til Stokkseyrar að halda þar námskeið.

Á námskeiðinu okkar kom til orða að sýndir yrðu munirnir. Því mótmæltu allir nema jeg og Aðalsteinn. Það varð úr að allir fengu leyfi til að koma með vini sína og vandamenn. En þar sem allir höfðu mótmælt að sýna muni sína fannst okkur að ekkert ætti að sýna nema okkar hluti. Að minsta kosti máttu þeir ekki verða út undan. Og til þess að sjá fyrir því að svo yrði ekki stóð Aðalsteinn í dyrunum með körfuna mína og rjómatrogið sitt.

Nafnið á rjómatroginu er þannig til komið að á systrakvöldinu fór rjómi á tána á Aðalsteini. Ein stúlkan þurkaði af tanni með fína vasaklútnum sínum. Daginn eftir byrjaði A. á körfunni, hún var eins og trog í laginu og kom til orða að hann gæfi þeirri sem þurkaði rjómann kröfuna fyrir rjómatrog. Nú hætti jeg hreint og beint. En blessaður mundu eftir að vitja um böggulinn fyrir Ingimar.

Vertu blessaður.

Jeg bið að heilsa öllum kunningjunum. Ekki síst ef þú sjerð einhvern frá E.b. Líði þjer alltaf vel, þess óskar þín systir Vigdís Ólafsdóttir.

Læknishúsinu 25. mars 1922

Kæri Mummi!

Þakka þjer fyrir brjef sem jeg fékk í gær. Við fengum skóna og skúfsilkið og líkaði hvort tveggja vel. Á miðvikudaginn á að vera U.M.F. fundur. Jeg í dagskránefnd. Jeg held að það sje að verða móður að kjósa mig í hana. Nú erum við farin að haga því þannig til að form. nefnir fyrsta mann. Sá sem kosinn er þann næsta og hann þann þriðja. Um daginn var hjer hreppsfundur. Þar kvað hafa verið sagt margt og skemmtilegt. Einn sagði t.d. að ef til vill gæti sjúkrahúsið orðið dálítill gróðrarstöð. Annar sagði að. - Jeg má ekki segja meira. Snorri í Bráðræði er dáinn. Fyrir nokkrum dögum sigldi bátur Gísla í Höfnum upp á sker. Þá voru þrír menn látnir fara niður í lítinn bát, en í honum var mikill fiskur og þungt akkeri. Þessir menn voru þeir Andrjes á Litlu-Háeyri, Valdi sonur Gíslínu og Þórarinn frá Búðarhúsum. Jeg held að hann hafi verið á Háeyri í vor sem leið. Bátnum hvoldi og Þórarinn drukknadi og hefur ekki fundist enn. Hann var nýgiftur og á tvö kornung börn. Það hefur verið dæmalaust gott veður þangað til nú að komið er frost. Hjer á heimilinu gengur alt sinn vana gang. Pabbi hefur heldur lítið að gera.

26.

Nú er kominn sunnudagur. Þar sem fátt er frjetta er best jeg segi þjer hvernig jeg hefi haft það síðan í gær. Þegar jeg hætti að skrifa fór jeg vestur í lyfjabúð og keypti mirru, þegar jeg kom heim fór jeg að háta börnin. Svo fór jeg í leikfimi. Þar var ákveðið að við stúlkurnar hefðum leifimissýningu á næsta miðvikudag. Áður vorum við búnar að ákveða að sýna ekki fyr en eftir nokkrar vikur, en þá kom það fyrir að það á að fara að nota Fjölni sem sjúkrahús. Nú er Silla¹ í Johannes V. búð². Ekka lagðist á sæng í vetur og eignaðist son. Í dag á að vera stúkufundur. Jeg er að hugsa um að fara ekki á hann. Í morgun fór jeg snemma á fætur og fór að sauma. Þar næst drukkum við kakó að vanda. Eftir mat skrapp jeg til Imbu B. Hún bað að heilsa. Seinast þegar stúkufundur var fórum við Ingimar og Aðalsteinn heim til Ingibjargar eftir fund. Manstu eftir kvöldinu góða í fyrra? Þá skemmti maður sjer. - Eftir kvöldmat þann sama dag kom I. og A. hingað. Eins og þú ef til vill manst er alltaf gaman að hafa þá hjá sjer. Nú eru Stína og Heiða hjerna. Þær biðja að heilsa. Jeg fer að passa að láta stelpurnar ekki vita þegar jeg skrifa þjer því að brjefið verður þá ekki annað en kveðjur frá þeim. Vertu nú sæll. Jeg bið að heilsa öllum.

Systir Vigga sæt og góð o.s.f.

Þetta er nýtt digtelse sem ekki má þekkjast.

Vigdís Ólafsdóttir.

¹ Silla á Háeyri

² Það er Jóabúð sem var rétt fyrir austan læknihúsið gegnt Háeyri.

Læknishúsinu 22. apríl 1922 kl. 7 fyrir hádegi

Elsku Mummi!

Jeg er svo skjálfhent að jeg get varla skrifað. Jeg held að það sje vegna þess að jeg er ekki almennilega vöknuð. Í gær ákvað jeg að jeg skyldi skrifa þjer í dag og mín fyrsta hugsun var þegar jeg opnaði augun: Best er illu af lokið, það ljet jeg mjer að kenningu verða og settist undir eins niður til að skrifa. Nú er sunnudagur og sólin skín heldur skært inn um glugann minn. Óli sefur hjá mjer og hrytur hátt að vanda. Jeg heyri að hin börnin eru vöknuð. Þau láta sjaldan á sjer standa. Svo er verið að hita kakó.

Kl. 9.

Nú er dagurinn á enda. Þegar jeg var búin með morgunverkin, kom Kristín til okkar. Svo kom Steinun frá Hróarsholti (Steinka mín) og maður hennar. Þegar þau voru búin að drekka kaffið fór jeg á stúkufund. Hann byrjaði kl. 5. og endaði kl. 8. Þá var skipað í embætti. Jeg var skipuð aðstoðar-dróttseti. Fundurinn var skemtilegur eins og stúkufundir altaf núorðið. Þó tek jeg U.M.F. fram yfir stúkuna þrátt fyrir það þó fundir sjeu ekki jafn fullkomnir. Þá er best að jeg byrji á páska sögunni. Á skírdag var afmæli Sigga. (Daginn áður kom Teti með kort frá ykkur og brjef frá Jakobi, mjer þykir þú vera orðinn æði latur að skrifa. Á skírdagskvöld kom Oddrún hingað, af tilviljun, og drakk kaffi. Teta, Kjartani, Sigga í Túni og Mumma var boðið. Föstudeginum langa er jeg búin að gleyma að mestu leyti. Samt man jeg það að jeg kepptist við að sauma og mig minnir að Ingimar hafi litið inn um kvöldið. Á páskadag fór jeg vestur á símsstöð, þar var jeg nokkuð lengi. Svo kom Jórunn með mjer hingað heim. Þegar við komum ætluðu Herdís og Jakobína að fara að ganga út og með þeim voru Oddrún og Ingunar(?). Við Jórunn slógumst í för með þeim. Við gengum langt vestur á sand. Þegar við komum heim drukku allir kaffi. Svo fór fólkið í kirkju en við Herdís vorum heima með börnin. Þegar komið var úr kirkju hljóp jeg til Silla(u)¹, svo borðaði jeg kvöldmat, en á eftir honum fór jeg að hátta. Veður var hið blíðasta þann dag allan.

Á annan var leiðinlegt veður. Þann dag hjelt jeg mjer á mottunni þangað til kl. að ganga 6 að jeg ásamt Jakobínu.

Í gær hitti jeg Kára. Hann ætlar að taka hjólið að hreinsa það². Mig langar til þess að senda þjer stýrið til þess að láta „nikkelhúða“ það. Svo langar mig afar mikið til að kaupa sæti og fríhjól. Þú ættir að komast eftir hvað þetta kostar og segja mjer. Kári hjelt að fríhjól kostaði um 20 kr. Ef það kostar ekki meira finnst mjer sjálfsagt að gera það. Jeg á við að við borgum það. Ert þú ekki til í að leggja til helminginn. Jeg segi fyrir mig að mjer finst mínum sparisjóðspeningum ekki betur varið til annars. Ef þú

¹ Silla á Háeyri

² Þetta hjól gerði Ólafur upp eftir að hann byrjaði í vélsmíðjunni og notaði sem varahluti annað hjól sem Guðrún vann á tombólu. Til er ljósmynd sem sýnir Guðrúnu með þetta fína hjól.

ekki vilt slá til þá er jeg til með að eyða mínum síðasta eyri, eins og Jóhann V. til spítalans. Það er að illt að hafa ekki fríhjóll. Þar er betra að kaupa það heldur en hinsegin bremsur.

Jeg treysti þjer til þess að komast fljótt eftir verði á þessu, því að mig er farið að langa mikið til að koma á hjól.

frh.

og Aðalsteinn fylgdi Herdísi til Stokkseyrar. Hún hefur námskeið þar og lætur vel af sjer. Hún heldur til hjá frú Guðrúnu Torfad. Við komum til hennar og fengum kaffi, hjeldum síðan heim, og komum þegar verið var að borða kvöldmat, blaut eins og hundar af sundi dregnir. Þennan dag vildi það slys til að bátur fórst á Stokkseyri. Á honum voru átta menn. Einn þeirra var Þorgrímur sonur Jóns hreppstjóra á Stokkseyri. Sá sem hjelt fyrirlesturinn um árið. Formaðurinn hjet Bjarni Sturlaugsson. Hann ljek annan stúdentinn í Skuggasveini. Einn hjet Þorkell Þorkelsson, sá ljek Harald. Jeg held að þú þekkir ekki fleiri. Þennan dag reru tveir bátar hjer. Þeir sem lágu vestast. Jón Helgason og Jón Jakobsson. Þegar hinir sem austar lagu ætluðu að fara var farið að brima. Þessir tveir bátar komust með naumundum inn. - Jeg gleymdi að geta þess að á skírdag kom Stína Guðmunds hingað og jeg fór út með henni og á annan komu þær Ljósa og Gústa³ sem snöggvast. Sesselja⁴ fór heim til sín um páskana. Á sumardaginn fyrsta fórum við snemma á fætur og drukkum öll inni í austur herberginu, veður var leiðinlegt við vorum öll heima og einginn kom fyr en eftir miðjan daginn. Þá kom frú Margrjet⁵ (hún kom hjer líka ásamt Ragnheiði á annan) og frú Oddrún⁶, Ingimar og Aðalsteinn kom líka en A fór fljótlega heim. Um kvöldið fylgdum við Oddrúnu heim, en Ingimar borðaði hjá okkur.

Nú er kominn miðvikudagur - kvöldmatur. Allir formenn hjeldu hásetaveislur og fóru því margir á kendirí en fáir voru mikið fullir. Daginn eftir þvoðum við en um kvöldið kl. 9 fórum við Jakobína ásamt Ingimari, Aðalsteini og Hönnu, vestur til Ingibjargar Bjarnad⁷. Þar var gaman. Guðmundur á Háeyri hefur verið mikið veikur, margir held jeg að hafi óskað eftir að hann hrykki upp af. En það gerði Þórdís⁸ ekki. Hún sagðist vona að guð lofaði honum að lifa nokkuð lengi án þess hann fengi þó fulla heilsu, því að með því einu móti gæti hann búið sig dálítið undir dauðann og fengið að iðrast. Henni finst víst ekki vanþörf að hann geri það. Það lítur út fyrir að hún hafi verið bænheyrð, því að Guðm. er í bata en er orðinn svo hjartablaður að hann má varla tala. U.M.F.E. ætlaði að halda skemmtun á sumardaginn 1. Í skemtinefnd voru Laugi, Jói K., Silla, Heiða og jeg. Jeg sagði undir eins af mjer því starfi. Bæði var stuttur tími til undirbúnings og svo gerði jeg það líka til að forðast sprengingu. Þeim datt það

³ Ágústa var fósturdóttur Þórdísar, Ljósu.

⁴ Sesselja frá Selfoss-bænum.

⁵ Margrjet gæti verið kona Haraldar Blöndal ljósmyndara.

⁶ Oddrún frá Hvoli, dóttir Sveinbjörns sýslumanns. Olli sonur hennar var með Guðmundi í menntaskólanum.

⁷ Varð síðar þekkt leikfimikennari í Reykjavík (?).

⁸ Þórdís ljósmóðir.

snjallræði í hug að gefa sjúkrahúsinu ágóðann, en það vildi jeg ekki. Mjer fanst fjelagið hafa nóg með sína peninga að gera og ekki þurfa að ausa þeim í hítina sem alt gleypir. En þetta er æsingamál og jeg hugsaði að ef skemtunin hætti þá yrði ekkert úr því. En Laugi kom þá með tillögu á fundi að við gæfum sjúkrahúsinu 25 kr. Hún var samþykkt. Enginn mótmælti nema Aðalsteinn mjög hógvært. Siggi K. talaði á móti honum þau ljótustu orð sem jeg hefi heyrð á fundi en át það allt niður í sig aftur. Hann nefndi meðal annars þessi aðskotadýr, sem enginn vissi hvaðan kæmu. Þau þættust vita mikið en vissu ekkert. Í sambandi við þetta skammaði hann Aðalstein svo allir hlutu að skilja að hann var einn af aðskotadýrunum. Þá gerði A. þá fyrirspurn um hvort Siggi ætti við sig. Hann vildi láta hann segja það berum orðum. Siggi sagði nei og var þar með búinn að taka alt aftur sem hann sagði. Ungmennafjel. hefur hingað til verið laust við þessa vitleysu og jeg vona að hún losni fljótt við hana aftur.

Nú verð jeg að hætta því jeg á að fara að gera hreint apotekið með mömmu og við þurfum að vera búnar áður en pabbi kemur á fætur. Jeg á að biðja þig að líta eftir veggfóðri sem hægt væri að hafa á austur herbergið. Ódýrasta er veggfóður hjer á kr. 1,35 rúllan. Svo þurfum við líka að fá kalk áður en þið komið því að þið eigið að kalka þegar þið komið.

Nú er byrjað próf í barnaskólanum. Honum verður víst sagt upp á sunnudaginn kemur. Jeg bið þig að skila bestu kveðjum til allra í húsinu⁹ og svo til frændfólksins. Ef þú hittir Ellu¹⁰ Þorkels þá segðu henni að skrifa mjer fljótt.

Vertu blessaður og gleðilegt sumar.

Þess óskar þín systir Vigdís Ólafsdóttir. Allir biðja að heilsa.

⁹ Þetta hús er Klapparsígur 20 þar sem Vigdís Pétursdóttir bjó með manni sínum Einari Finnssyni. Þeirra börn voru Valgerður og Finnur.

¹⁰ Ella var bekkjasystir Viggju í Kvennaskólanum.

Læknishúsinu 11. maí 1922

Elsku Mummi!

Nú erum við í óðaönn að gera hreint á loftinu. Það þarf að mála öll loftin og betrekkja stóra herbergið. Í gær fengum við mann til að eiga við sandinn á garðinum og aka út úr gryfjunni að öðru leyti getum við ekki átt við garða fyrr en eftir helgi. Jeg skrifa þjer þessar línur aðeins til að þakka þjer fyrir þitt góða brjef og láta þig vita að nú er Kári kominn með hjólið. Þegar hann kom með það var það alveg eins og nýtt. Okkur kom saman um að láta ekki nikkelera stýrið af því það er svo dýrt svo að hann lakkeraði það grátt. Svo gerði hann við sætið og það er nú það fínasta eins og þú kannski manst var Sveinn¹ búinn að segja að það væri ónýtt.

Jeg hefi tvisvar farið á því til Herdísar og skemmt mjer vel. Sveinn ætlar að kaupa í það fríhjól fyrir okkur um þann 20.

Jeg ætla heldur að spara það þangað til enda kemur það af sjálfu sjer þar eð jeg hefi svo mikið að gera.

Á sunnudaginn var kom Herdís hingað ásamt Guðrúnu Torfad. Þær komu til að skoða sýninguna sem U.M.F. hjelt. Það er sú langbesta sýning sem hefur verið haldin austan fjalls.

Vertu nú marg o.s.fr. Jeg bið að heilsa öllum frændum og vinum. Segðu Ellu að skrifa undir eins.

Þín systir Vigdís Ólafsdóttir.

Jeg ætlaði að vera afskaplega sparsöm á pappírinn en það fór þá svona.

Pabba og mömmu fanst sjálfsagt að við keyptum fríhjólið.

¹ Gæti hafa verið Sveinn járnsmiður.
GG-008-VO.doc

Læknishúsinu 12. jan. 1924

Elsku Mummi minn!

Þökk fyrir síðast og allt gott.

Vel gekk ferðin austur að Þjórsártúni. Við flugum á vængjum vindanna og ekki vantaði sönginn. Þegar austur kom voru fáir mættir, en fulltrúarnir smá tíndust en stjórnin ljet bíða sín til kl. 2.

Jeg var þarna eina konan með rúml. 20 karlmönnum en þeir voru allir svo dæmalaust góðir við mig. Þar á meðal annarra Óskar frá Benstöðum(?), sá sem við hittum við rjómabúíð í sumar, ekki þekkti jeg hann samt fyr en hann var búinn að minna mig á þetta. Á þinginu var unnið skarpt til kl. að ganga 12. Þá áttum við að fara að háttu en herbergið mitt var svo kalt að þar þurfti að hita upp með olíuofni og það varð að samkomulagi að við Eyrbekkingarnir fórum að spila og leið tíminn þá furðu fljótt. Við vorum vakin með kaffi kl. 8 næsta morgun. Hjá mjer var kolsvarta myrkur svo stúlkan fór inn til piltanna að fá sjer eldspýtur. Þá hafði Gísli Eiríks verið kominn fram úr rúminu og í fátinu sem á hann kom, þegar kvenmaðurinn kom, inn breiddi hann utanyfirbuxurnar bara framan á sig. Hinir strákarnir urður vitlausir úr hlátri og stúlkan varð að viðundri þarna hjá þeim, en upp frá þessari stundu tók hún okkur fram yfir alla aðra sem þarna voru saman komnir. Við máltíðir veittist mjer sá heiður að sitja við æðri endann við hliðina á kónginum Sigurði Greips. Sjálf þingtíðindin verða að bíða betri tíma og læt jeg því hjer staðar numið.

Við Sigrún¹ þvoðum mikinn þvott sem okkur gengur hálf illa að þurrka - merkilegt nok. Í gær var álfabrenna og dans á eftir. „Allir” buðu mjer. Jeg varð samferða frú Margrjeti² á brennuna, hún hafði tvíburana með sjer og dæmalaust voru þeir hrifnir. Þeir vildu helst ekki fara heim, þó allt væri búíð, heldur bíða og vita hvort ekki kæmi eitthvað meira. Guðjón³ í Vorhúsum ætlaði suður rjett eftir nýárið en komst ekki vegna ófærðar. Við vorum búnar að senda honum dótið og það situr ennþá hjá honum, enda bíður hann nú byrjar. Vertu blessaður.

Kær kveðja, þín systir Vigga

¹ Sigríður í Túni var vinnukona lengi. Ein systranna fékk taugaveikina.

² Margrét Blöndal.

³ Guðjón og Kjartan voru vörubílstjórnarnir á þeim tíma.

Læknishúsinu 20. júní 1924

Kæri Mummi minn!

Nú heim er jeg komin og halla undir flatt¹, o.s.frv. Í gær kom Ingimar og sagði okkur að þú yrðir laus í næstu viku. Þá hugsaði jeg nú til Gunnu og þess sem við höfum lofað henni. Nú verður þú að láta hana vita um lausn þína.

Mjer fyndist ágætt að hún kæmi hingað á föstudaginn næsta eftir að þú kemur ef þú t.d. kemur á miðvikudag.

Við fengum brjef frá Jakobi. Þar segir hann að þeir sjeu búnir að taka próf í þrennu og honum gekk vel í öllu.

Gullfoss liggur hjer úti fyrir og er með vöru til Heklu og Jóhanns. Ketill er í timburvinnu² hjá Sigurjóni og nú er hann heima að borða og sagði okkur frá því að Imba sem hjá okkur er, hafi staðið hálf tíma í dyrunum og horft á þá og svo kom lýsingin stutt og digur, úfin og svo frv..

Nú eiga Pjetur og Óli að fara í mó í dag hvernig sem gengur að koma þeim af stað. Guðm. frá Sandi³ var hjer tvær nætur, fór í gær. Engin tilbreyting var hjer þó væri 17. og 19⁴. Við borðuðum samt tertu með kaffinu og um kvöldið fórum við Jórunn austur á Skipaflatar á hjólum og þegar við komum heim þá voru Helga⁵ og Ljósa hjer við kaffidrykkju. Jórunn er eina unga manneskjan sem jeg er með. Ástríður⁶ er í Kaupinhöfn en Stína hjá Sigga Óla⁷. Illa gengur garðyrkjan vegna sífelldra roka og þurrks. Vala hefur verið lasin en er á batavegi. Þú skrifar eða símar til Gunnu (nr. 5) og lætur hana vita um þína ferðir.

Blessaður og sæll og ágæta útkomu.

Þín systir Vigga.

Jeg læt innan í brjef sem jeg bið þig að koma til skila og bæta við ef þörf gerist. Adr. Guðrún Einarsd. Garðhúsum Grindavík.

¹ *hausinn er veikur og maginn.*

*Ég drakk mig svo fullan ég segi það satt
ég sá hvorki veginn né daginn. - Páll Ólafsson ?*

² Timbursala var næst fyrir vestan læknishúsið.

³ Guðmundur skáld frá Sandi.

⁴ Þetta er líklega 17. júní og kvennadagurinn 19. júní.

⁵ Helga móðir Jórunnar.

⁶ Ástríður Guðmundsdóttir.

⁷ Siggi Óla var kaupmaður á Selfossi.

Eyrarbakka 7. sept. 1924

Elsku Mummi minn!

Við erum nýbúin að fá þennan snepil frá þjer og ætla jeg hjer með að endurgjalda þjer hann.

Helstu tíðindi hjeðan eru þau að hjer er gestalaust í dag og er slíkt nýlunda, en þetta lagast bráðlega því að um miðja vikuna er von á Jakobínu með Halla Eiríks og Stínu Jóns og að líkindum kemur þá Jakob um næstu helgi.

Á föstudaginn varð Guðrún 4 ára. Hún fekk að bjóða þeim sem hún helst vildi, en það voru þessir: tvíburarnir með Margrjetu og Dúfu¹, Kristín² með öll sín börn, Ljósa og Gústa³, Dísa og Þóra. Hjer var nú heldur en ekki gangur þegar þetta var alt saman komið, alt á tjá og tundri og allan daginn í gær vorum við að uppgötva eyðileggingar eftir þetta lið, einkum tvíburana. Næsta föstudag fer jeg nú að tifa upp á þrítugsaldurinn⁴, þá gæti jeg nú trúað að „ráðsett fólk yrði til staðar“, það er að segja ef nokkuð verður.

Jeg þakka þjer ástúðlega fyrir síðast. Á heimleiðinni komum við við á Stóra Hrauni, þar hitti jeg skólasystur mína sem Elínborg heitir og er Brynjólfsdóttir, blessuð sje minning hennar, hún er eldabuska hjá Hálfðáni bónda, svo gengum við heim Flatir og fengum töluverða rigningu. Þú fjeckst slátturekjuna, en hún kom sjer ekki eins vel fyrir mig því að jeg þvoði stórþvott á mánudaginn. Hjer er allt við sama. Batinn fer hægt á Herdísí hinir eru frískir og nóg að starfa hjá kvenþjóðinni. Jón Pjetur⁵ lagðist í barnaveiki í gær. Pjetur hefur enga vinnu haft. Willemore⁶ kom með olíu en var ekki sinnt. Þeir sem höfðu vinnuna í akkorði voru úti við á að veiða og komu ekki þó þeim væri flaggað en skipinu ekki gefið neitt merki svo það fór með olíuna. Í gær kom brjef frá Katli, hann lætur vel af sjer og ætlar að vera fram yfir rjettir. Óli vill helst vera svo lengi á Selfossi en hann verður víst búinn að fá mislinga um það leyti, því nú eru fimm manns með þá á austurbænum⁷.

Blómin okkar fóru illa í slátturekjunni þinni, en eru nú að rjetta við.

Vertu blessaður og góða ánægju í Bæjarkirkju⁸, ekki get jeg komið þangað, því jeg kemst ekki spönn úr ...

Þín systir Vigga.

Kær kveðja frá öllum til allra.

¹ Dúfa var systir tvíburanna.

² Þetta á líklega að vera Krístrún systir Jónasínu í Reykjahlíð sem kom suður með Aðalbjörgu og giftist Andresi, sem síðar var virkur í verkalýðshreyfingunni. Hann var sjómaður og fór á síld á Siglufirði.

³ Gústa í Brennu.

⁴ Vigdís fæddist 12. sept. 1904 og lést 11. janúar 1926. Hér er hún að verða 22ja ára.

⁵ Jón Pétur var elsti sonur Krístrúnar.

⁶ Willemoes?

⁷ Austurbærinn á Selfossbænum.

⁸ Er hér verið að vísa til Gaulverjabæjar?

Eyrarbakka 21. okt. 1924

Elsku Mummi minn!

Jeg þakka þjer línurnar sem þú sendir mjer forðum. Nú ætla jeg að senda þjer fyrir skyrtuna svo átt þú að senda mjer mjer álit þitt og yfirlit yfir gallana, og mun jeg gera mitt ítrasta til að fækka - hafa þá færri á þeirri næstu. Efnið er „ósvikin álnavara frá Laugu litlu", svo að um gæðin þarft þú ekki að efast.

Á laugardagskvöldið var haldinn ungmennafjelagsfundur. Jeg fór þangað og þótti fundurinn góður. Þar var meðal annars ákveðið að hafa sýningu hjer í vor, á hún að vera nokkurskonar undirbúningur undir sýningu sem haldin verður að Þjórsártúni í sambandi við íþróttamótið. Jeg held að þú ættir að reyna að búa til fallega pönnuköku, þó ekki væri annað. Á eftir var dansað í hálf tíma og þar skemmti jeg mjer vel, en mikil er breytingin frá því jeg var hjer síðast á balli, þeir sem nú eru aðal herrarnir voru í barnaskóla í þann tíð, t.d. Gísli Eiríks, Valdimar á Sunnuhvoli og svo frv. Helga Björgvins¹ talaði við mig í kvöld, bara til skemtunar. Fáar frjettir sagði hún mjer aðrar en þær að Elsa litla ætlar að fara austur í Vík og vera þar um tíma. Lalli og Steini komu hjer á afmæli Ketils. Þeir sungu mikið og skemtu sjer vel. Sigrún var það kvöld þangað til kl. 7 Katli til heiðurs. Þeim semur vel. Nú stúderar Ketill Möller. Hann sagði Sigrúnu að Möller segði að maður ætti alltaf að vera fyrir opnum glugga. Sigrún bað hann undir eins að berja út eldhúsgluggann og hann gerði það samstundis.

Ef til vill kem jeg suður með Herdís, hún ætlar í Borgarnes. En jeg er nú orðin svo lífsreynd að jeg treysti ekki algjörlega á að það verði en vonum það besta. Kennslan gengur, takk bærilega.

Hálf kunnir jeg illa við tennurnar í Jórinni, en jeg er nú samt dálítið farin að venjast þeim enda sje jeg hana oft. Nú er fjölgað í Tungu, þann 9. fæddist þar stúlka og líður nú vel.

Inga og Ólafur frá Hjálmholti komu hingað í gær annars hefur verið lítið um gesti. Pabbi hefur verið sóttur nokkuð mikið nú undanfarið.

Vertu nú blessaður. Ef til vill sjáumst við bráðlega. Góða líðan. Kær kveðja frá öllum til allra. Þín systir Vigga

Herdís biður þig að koma þessum sokkum til Jóns Ármanns og Jakobínu langar til að vita hvort Einar hefur sent þessar 30 kr sem hún bað hann um. Vigga

¹ Hún var skólasyntir Vigdísar, frá Stórólshvoli. Björgvin sýslumaður og matmaður mikill. Guðrún og Bergljót hjóluðu þegar þær voru um ferminu austur að Skógafossi. Þá gistu þær á Stórólshvoli. Þar hittu þær Björgvin sem ræddi við þær vinkonurnar um kvöldið. Þegar Guðrún kom niður í eldhúsið um morguninn sat hann þar og hreinsaði beinin. Helga var ekki heima en þeim var tekið mjög vel.

Eb. 13. des. 1924

Elsku Mummi!

Mamma biður þig að kaupa jólagjafir og koma því austur ef unnt er. Tíminn síðan jeg skrifaði þjer síðast hefur verið mjög viðburðaríkur. Fyrst voru skemmtunin ágæt um kvöldið, svo kom kvöldvakan hún var góð. Við Gilli litli vorum húsbændur, - Ingimar, Aðalsteinn og Sigga hjú; og það voru fyrirtaks hjú. Það verð jeg að segja, svo kemur silfurvikar með allri sinni dýrð þessu næst þvotturinn og þá komedía og hún var í gærkvöld. Þetta þarf jeg alt að útskýra fyrir þjer þegar þú kemur. Þín systir Vigga
kær kveðja.

Eyrbakka 27. mars 1925

Elsku Mummi minn!

Jeg þakka þjer kærlega þitt góða brjef. Sama dag fekk jeg brjef frá Helgu Jessen og hafi jeg ætlað að skrifa, hefur allt lent í því að hugsa um hvoru ykkar jeg ætti að skrifa fyrst, og svo ekkert orðið úr neinu.

Í dag er indælis veður, enda er alt á ferð og flugi. Allir sem vettlingi valda og sjómaga hafa róa. Fiskurinn mokast á land þá sjaldan að gæftir koma. Pjetur hefur farið nokkra róðra með Sigurði Ísleifs. Á þeirra báti eru snikkarar, úrsmiður, skóari og bílstjórar. Pjetur er búinn að fá 66 heljar stóra þorska. Hann fekk að salta þá í timburskúrunum hjá Sigurjóni.

Helga J. kennir börnunum í vetur og ætlar svo að koma suður í sumar. Hún ætlar að koma með hjólið sitt með sjer svo að hún geti skroppið austur.

Hjer var haldin stúkuskemmtun. Hlín og Eyraósinn slógu saman og máttu meðlimirnir hafa með sjer gest. Aðalsteinn bauð mjer. Þar var leikinn fram úr hófi vitlaus sjónleikur, en hann var vel leikinn. Þar kom í ljós nýr leikari og til allrar hamingju er sá í ungmennafjel. og það er Villi trjesmiður. Yfirleitt sjeu bestu kraftar staðarins í því fjel. Sigurður Greipsson kom hingað um daginn. Þá var skotið á fundi honum til dýrðar. Það var ljómandi góður fundur. Þar var meðal annars samþ. að veita verðl. fyrir bestu ritgjörð um efni sem ritstjórinn til tæki. - 1. verðl. er lestrarbók Sigurðar Nordal. Á eftir fundi var dansað dálitla stund, en þegar við ætluðum heim var kominn blindhríð. Júlli stakk þá upp á því að ljósin yrðu slökkt og sögð draugasaga, en af því jeg var gamall Norðlendingur, þá lagði jeg út í hríðina og komst heim heilu og höldnu.

Daginn eftir kom Sigurður og Sigurjón frá Kálfholti hingað. Þeir voru eitthvað að undirbúa sýninguna sem halda á að Þjósártúni í vor. Nú er jeg að verða útlærð í spuna og ætla því að fara hætta þeim lærdómi. Þrátt fyrir alt annríki er þó einn sem altaf er iðjulaus og það er Guðm. á Háeyri. Hann er altaf fyrir augunum á mjer, en samt getur mjer ekki dottið neitt almennilegt í hug til að segja þjer og læt því hjer staðar numið. Þegar til kom fannst mjer skömm að senda þjer bara einn auðvirðilegan snepil svo jeg byrjaði á öðrum en þjer finnst nú ef til vill ekki betra að fá tvo.

Ranka frá Loftsstöðum var nótt hjá okkur, hún býr nú í Meðalholtinu hjá manni sínum. Þegar hún fór fylgdi jeg henni austur að Gamla Hr.

Við fengum rigningu svo jeg hljóp í einum spretti alla leið heim. Jeg varð svo hrifin af mínum eigin dugnaði að mjer varð á að hugsa hvort jeg gæti ekki tekið þátt í hlaupinu á næsta íþróttamóti!!!! Eins og þú kanske manst þykir jeg ekki frá á fæti.

Einu sinni um daginn kom Jórunn hingað og bauð mjer með sjer upp að Skála.

Magnús var að fara þangað með tóman bíl. Jeg þáði þetta góða boð. Við fórum svo út að Fossi og fengum kaffi og heitar pönnukökur hjá Lillu. Nú er hún komin hingað niður eftir og er ráðskona hjá skipshöfn ofan af Akranesi hjer er önnur skipshöfn frá Sandgerði sem býr í Pjetursbænum.

Jeg er nýbúin að lesa Lodsén og hans Hustru eftir Sie og er nú með Thomas Ross, en mér miðar lítið, yfir leitt er jeg ónýtt við allt í vetur, verður lítið úr framkvæmdum, þó að jeg sje smásaman að einsetja mér að vera reglulega dugleg, þá fer það alt út um þúfur, áður en varir.

Lítið verður víst úr ráðagerðinni okkar, þeirri að fara í kaupav.. Jeg hangi víst hjer heima að vanda. Ert þú búinn að ákveða þig fyrir sumarið?

Við erum búnar að sá sumarfræum í kassa til þess að planta út í vor, en slæmar eru horfurnar með blettinn og hólinn. Þeir hafa farið svo illa í þessum sífeldum sandrokum og ofviðrum.

Mótorbátarnir fengu slæmt á sunnudaginn var. Magnús Oddsson fekk svo mikinn sjó yfir sig að hann varð að taka sundtökin upp á þilfarinu og það varð honum til lífs að hann náði taki á sporði og hjelt sjer þar dauða haldi.

Vefnaðurinn gengur greiðlega hjá nemendum Herdísar, enda er hún upptekin frá morgni til kvölds. Nú á bráðum að halda spítalaskemmtun. „Það veitti víst ekki af að fá þó ekki væri nema 100,00 kr sem hægt væri að safna í það þarfa fyrirtæki” segja kellingarnar.

Skilaðu kveðju til allra minna kunningja. Þín systir Vigga.

Eyrarbakka 6. apríl 1925

Elsku Mummi!

Jeg get ekki látið vera að skrifa þjer af því jeg fæ ágæta ferð. Imba Tómasar er nefnilega að fara til Víkur. Hún ætlar í fiskvinnu að leita gæfunnar var sagt við mig um daginn. Í dag er ágætis veður. Pjetur ætlar að fara að róa, þeir mistu af róðri í gær vegna þess að sumir fóru í vinnu við uppskipun.

Við mamma og Herdís fórum út að ganga í gær. Jórunn fór með okkur. Við gengum eftir fjörunni austur að Háeyrarvöllum. Þar fórum við upp á flatir og svo heim. Jórunn drakk svo vatn með okkur. Síðan settumst við inn í hlýja stofu. Jeg merkti koddaver fyrir Herdísi, en hún bjó til skúf fyrir mig. Ketill las hátt fyrir okkur í „Brjefi til Láru”. Það er bók að hans skapi. Jeg er nú ekki að rugla þetta við þig af því að mjer finnst það svo merkilegt heldur af því að jef hefi ekkert markvert að segja - Og andans fátækt þar af sjerðu mína. Mamma biður þig að skipta um kveiki ef hægt er. Þessir eru of þykkir. Nú er Nielsen að fara til Hafnar að leita sjer atvinnu, frúin ætlar svo á eftir með börnin. Hann fór að æfa leikfimi og hjelt sýningu að lokum. Jeg fór þangað við Jórunn sátum í fremsta bekk á senunni. Magnús var í leikfiminni og gekk fremstur, stóð hann því rjett fyrir framan okkur og jeg gat vorkent honum. „Það segi jeg alveg satt”. Nú er jeg hætt að spinna orðin útlærð!! Guðrún litla er hálfslasin svo hún er í rúminu í dag, hún er samt hress - vill nú helst sitja uppi á borði og horfa út um glugga. Við erum að láta okkur detta í hug að Jakob geti komið um páskana, ef til vill eru það tálvonir. Mömmu langar mikið til að heyra draum Jakobs. Magnús mágur¹ hafði komið hingað á höfnina í gær, en kom ekki í land. Hann skrifaði mjer bara nokkrar línur. Kær kveðja. Jeg vonast eftir línu. Þín systir Vigga.

¹ Magnús Vagnsson maður Valgerðar Ólafsdóttur [vp]

Eyrarbakka 14. apríl 1925

Elsku Mummi!

Jeg þakka þjer brjef meðtekið á skírdag. Jeg vona að þú hafir síðan fengið brjef sem jeg sendi með Imbu Jónasar.

Jeg hefi nú fáar frjettir enda er von að jeg sje innantóm eftir daginn í gær.

Fyrst og fremst var vont veður allan fyrrihlutann svo jeg sat inni við vinnu mína. Í miðdegiskaffið komu svo gestir, Sandprýðarfólkið, Kristinn með sín börn og Siggi í Túni. Þessu fólki var boðið í tilefni af því að herra Sigurður Gíslason varð 9 ára. Eftir kvöldmat var svo slegið upp smá balli vestur í Fjölni. Við Pjetur fórum þangað. Hann er farinn að hafa gaman af að taka þátt í þessháttar. Þarna var Jórunn og þarna var Stína og Siggi Óli og margt fleira, en ekki Ástríður. Jeg er ekki farin að sjá hana ennþá, en heyri sagt að hún sje ósköp ánægð, sem eðlilegt er um nýtrúlofaða manneskju.

Nú á Guðmundur á Háeyri gullbrúðkaup innan skamms. Þrjár konur gengu um Bakkann í gær til að safna samskotum í gjöf handa þeim hjónum. Jeg heyrði sagt að þeirra æðsta takmark sje að hafa þetta veglegra heldur en 9. des í vetur. En ólíkt er til stofnað, þær komu jafnvel til Ljósu og pabba og Helgu á stöðinni. Mamma skrifar þjer víst allar frjettir. Um daginn var haldinn Ungmennafjelagsf.. Þar voru nokkrir gestir sem komu alveg að óvörum, en fundurinn var svo ágætur að við þurftum ekki að skammast okkar. Siggi Stjána flutti fyrirlestur um helstu hetjur sögualdarinnar. En Júlli talaði um nautnir, varð hann ærið brosleitur þegar farið var að tala um dansinn. Sagði hann að það væri sín veika hlið og þar rataðist honum satt af munnni. Um þetta mat var mikið rætt og talaði Aðalsteinn þá ansi skemmtilega. Yfirleitt finst mjer hann vera fjörugastur í þessum síðustu og verstu tímum.

Nú hefur fólk hjer um margt að tala, að vanda og er það að vísu ekki þess vert að hafandi sje eftir, en það er nú svona jeg hefi enga(n) kjamfaðm (??) á boðstólnum. Einkum verður mömmu tíðrætt um þá hina ungu menn sem hjer eru til sjósóknar, ofan af Akranesi. Sesselja á Fossi er ráðskona hjá þeim og sagt er að Borga á Blómsturvöllum sje orðin selskapsdama þar og sje sjálfboðaliði. Heyrt hefi jeg að Magnús Torfason hafi auglýst eftir ráðskonu og boðist 33. Hafði tekið mikinn tíma að velja úr þeim hóp. Hann þurfti margar að spyrja og talar hægt. H.Bl. sagði að hann hefði altaf byrjað á að komast eftir hvað gamlar þær væru og hvort þær væru hreinar meyjar.

Um daginn var Jakobína að segja Katli að pabbi og mamma hefðu átt 12 börn, 4 væru dáin. „Hver dreypti þau” sagði Geie minn, hún lætur það altaf eitthvað heita.

Lítið las jeg um hátíðarnar. Tíminn fór allur í ekkert eins og alltaf þegar jeg ætla að vera dugleg. Á páskad. var svo gott veður að jeg var eiginlega úti allan liðlangan daginn, nema rjett á meðan jeg meðtók andlega og líkamlega fæðu. Í kirkju var kveljandi hiti og óloft enda leið yfir einn mann. Mest gaman þótti mjer að sjá Einar í Hallskoti þríla upp á skírnarfontinn til þess að geta kveikt á ljósakrónunni.

Vertu nú blessaður. Jeg ætla að þvo á morgun. Það vildi jeg að þú gætir sjeð til þess að við fengjum þurkk. Hann hefur verið stopull hjá okkur í vetur. Kær kveðja

GG-016-VO
GG-016-VO.doc

Þín systir Vigga.

Þess er vert að geta að Siggi Óla er farinn að dansa heilmikið við mig og er ekki hægt að skilja það nema á einn veg þ.e.a.s. að Stína álítur mig trúlofaða, en ekki hefi hugmynd um hvernig hún getur hafa fengið þá flugu.

Eyrarbakka 26. apríl 1925

Elsku Mummi.

Jeg sendi þjer smá foretningabref, því Ástríður ætlar nú um hádegi en tíminn hefur verið notaður nú undanfarið. Þá er fyrst og fremst stjúp módur og svo einhverjar fleiri fagrar tegundir af blómafræjum. Svo vantar okkur allar kálteg. svo sem savojakál, grænkál, gulrætur, radísur, kjörver, persil, blómkál. Svo langar okkur til að biðja Vigdísi að kaupa skó á okkur systurnar þrjár. Á litlu telpurnar lakkskó eins og þá sem hún keypti í fyrra handa Völu nr. 27 en Guðr. þarf víst 2 nr. minna. Handa mjer lága og fallega skó nr. 38. Jeg ætla að nota þá þegar jeg hefi mest við svo jeg treysti því að þið verðið smekklegr í valinu. Svo vantar okkur ljósgráan pappír til að hafa utan um blómsturpotta, viljið þið kaupa utan um nokkra og senda þetta svo alt með fyrstu ferð. Pjetur reri í morgun og fekk 9 í hlut en svo var báturinn dreginn á land og nú á ekki að róa oftar. Á sumardaginn fyrsta var hjer mikið um dýrðir. Allstaðar haldnar sjómanna veislur. Pjetur fór í veislu austur á Háeyri. Eftir hádegi fór jeg að klæða mig í mitt fínasta púss, en þegar sú athöfn var nú afstaðin hringdi Jórunn til mín og bauð mjer hest í útreiðartúr. Jeg skifti um föt í snatri og fór svo ásamt J. Dúnu á Hrauni og Bjarnfríði austur á Skipaflatir. Þar áðum við og hvíldum okkur. Við höfðum allar fyrirtaks gæðinga svo þetta varð góð ferð. Á heimleiðinni komum við við á Stóra-Hrauni og fengum kaffi. Þegar heim kom var Landprýðis fólkið hjer og sátu allir að eggjasnafsi. Um kveldið skruppu Jórunn og Helga hingað og um það leyti sem þær fóru heim var alsherjar fyllirí hjer á götunni. Þó losnuðum við við það mesta því fjölda margir fóru til Stokkseyyrar á dansleik sem þar var haldinn.

Á föstudaginn byrjuðum við á hreingerningum. Við þurftum að gera mikið við veggfóðrið á stofunni og svo málaði mamma loftin hjer uppi en nú verðu aftur hlé því við þurfum að þvo og svo er nú afmæli pabba seinni part vikunnar. Jeg geri nú ekki ráð fyrir að mikið verði um að vera þá því altaf fækkar kunningjunum. Kemur stórt skarð í þann fámenna hóp þegar H. og M.Bl. fara. Fólk hjer er alveg fullt upp með það að Jórunn sje að draga sig eftir öðrum hvorum ykkar Jakobs. Jeg hafði gaman af því að á balli hjer í vetur voru slaufur. Jórunn gaf Katli sína. Þá heyrði jeg sagt við hliðina á mjer: „Já, hún ratar samt á rauða kollana“, og jeg skildi. Á meðan jeg man þá óska jeg ykkur gleðilegs sumars og þakka ykkur fyrir veturinn.

Okkur þætti gaman að heyra frá Stínu hvað hún fær í fermingargjöf og því um líkt. Við vonumst eftir Jakobi sem fyrst. Magnús fer að vinna hjer strax eftir lok en þar fyrir utan er hjer nóg að gera við húsið og kæmi okkur vel að fá góðan verkstjóra, því hjer er töluvert af höfuðlausum vinnukröftum.

Ketill var í allan gærðag að aka foksandi úr garðinum, en það sjer varla högg á vatni.

Hjer var gott fiskerí tvo undanfarna daga en nú er hann að brima aftur.

Í dag á að halda hjer fyrirlestur og messu svo jeg geri ráð fyrir að þessi dagur fari fyrir lítið.

Vertu nú blessaður og sæll og líði þjer altaf sem best. Þess óskar þín systir Vigga.

Kær kveðja til allra og hafðu skóna fallega góði minn.

Eb. 20. maí 1925

Elsku Mummi!

Jeg þakka ykkur skókaupin mjer þykja þeir góðir. Margt er í frjettum en tíminn er naumur. A. og Ingimar eru að fara suður. Undanfarna daga höfum við verið upptekin við sýninguna. Hún var haldin í Guðm. Nielsens húsinu. Í gærkvöld hreinsuðum við húsið og var þá heldur glatt á hjalla. Jeg var verkstjóri. Aðalsteinn og Siggí Stjáns gerðu „fínu verkin“ en Kári, Gísli og Valdimar skúruðu gólfín. Á eftir fór jeg smá hjólatúr því veðrið var blítt og nátturan laðaði mann að sjer. Þó samviskan segði mjer að jeg ætti að fara inn að háttu. Við erum búin að setja niður í heima garðinn og þann á flötunum svo ætlum við að fá Aðalsteins garð en niður í hann getum við ekki sett fyr en á föstudag. En svo kemur mórinn. Jeg veit ekki hvernig við förum með hann. Pjetur fæsti ekki til að gera neitt og nú er Sigrún farin frá okkur og þar af leiðandi verð jeg að fara niður og hjálpa mömmu með matinn og hætti því. Vertu blessaður, þín systir Vigga.

Eyrarbakka 9. des. 1925

Elsku Mummi.

Jeg hefi verið að bíða eftir brjefi frá þjer en þykist nú sjá að þú takir ekki gild þessi forretningsbrjef sem jeg hefi verið að senda þjer.

Nú ætla jeg að senda þjer miða fullan frjetta og ágætis orða.

Þá er nú þar til að taka að Jórunn liggur í beinbroti og líður hálf illa. Jeg hefi setið hjá henni dálitla stund í gær og fyrradag, en vikuna þar á undan leit jeg ekki á hana þá var Sigurður Greipsson hjer og jeg var alveg upptekin af honum. Hann var hjer í viku og kendi allskonar íþróttir.

Ketill var alveg á því námskeiði og Óli var í glímum og boðinu. Jeg var tvo tíma á dag ásamt 15 öðrum stúlkum og okkur kendi hann Möllers æfingar hinar nýju. Þú getur rjett hugsað hvort ekki muni vera tekinn Möller núna, að vísu er Sigrún hálf löt að baða sig, sleppir því nú dag og dag.

Eins og gefur að skilja þá langaði okkur til að gleðja kónginn. Það stóð til að halda kvöldvöku um þessar mundir svo hún var drifin á á laugardag. Húsið var hreint og heitt. Svo var borð í einu horni og við það sat kóngsi með Herdísi og Imbu á hægri hönd, en Jakobínu og mig á hina. Jeg var að vísu ekki stöðug, því jeg var þarna húsmóðir og hafði ýmsar áhyggjur. Svo sat hitt fólkið á víð og dreif með vinum sínum. Fyrst las Aðalsteinn svo Sigurður og þegar hann hafði lokið lestrinum komum við með kaffi handa öllu fólkinu. Þegar því var lokið fór Ketill að lesa, en frammistöðu fólkið tók að gæða sjer. Það var besta fólk svo sem jeg og Búlla, Sjana, Inga og Lauga, alt nemendur mínir, svo aðstoðuðu Sigrún, Óli Jens, Gísli Eiríks og Eggert. Kvöldvakan stóð til kl. 2 og endaði með húslestri og söng. Þarna var margt gott orð lesið og auk þess sagði kóngsi okkur frá norskri kvöldvöku.

Á sunnudaginn var jeg nú fyrst í Möller, fór svo til Jórunnar og síðan heim. Þá var Þórdís hjer með Kötú í Traðarholti og sýsli var hjer líka. Fyrst var drukkið kaffi og síðan farið að spila. Svo hjeldum við skemtun um kvöldið. Þar hjelt Sigurður ræðu um íþróttir. Aðalsteinn talaði og sýndi skuggamyndir og svo las Ingimar sögu og alt þetta endaði á fjörugum dansi. Þegar honum var lokið tók þetta partí, sem jeg nefndi áðan, sig út úr fór upp á loft með kónginn og hitaði sjer kaffi. Þar urðu fjörugar samræður því allir voru í besta skapi og höfðum við þarna ágæta stund. Eins og þú veist hvað gaman getur orðið í mátulega stórum hóp. Jórunn er á sama máli og við að gaman sje að heyra hann vin okka herma eftir Gísla gamla á Ásabergi. Hún var það verri en við að hún hló ekki, heldur bara gapti af undrun og aðdáun.

Nú er kvöld þess 9. Við Aðalsteinn og Ljósa drukkum kaffi hjer í baðstofunni og svo spiludum við dálitla stund. Nú ætla jeg vestur að Garði að segja telpunum til. Nú til jóla ætlum við að hafa tímana eftir kvöldmat.

Jeg verð að fara að hætta þó jeg viti að þjer fellur illa að fá ekki neinar frjettir frá mjer. Sjerstaklega þegar þær eru svona háfleygar.

Vertu nú blessaður og sæll og líði þjer vel. Jeg vona að jeg verði búin að fá brjef frá þjer fyrir helgi.

GG-019-VO
GG-019-VO.doc

Hvernig er það? Kemurðu heim um jólin? Jeg vona það fastlega. Annars er jeg hrædd um að hjer verði dauft. Viltu spyrja stjúpu hvort hún hafi ekki sent Jakobi púðann.

Kærar kveðjur
Þín systir Vigga.

Elsku Mummi minn! Lofaðu mér að vita sem fyrst hvort þú fekkst ekki bréfið með böggulinn til frú A.S. og hvort hún hefur ekki borgað þér.

Þú drífur með þér um jólin Jakob eða Hálfván. Vertu blessaður, þín fr. Herdís.